



BPN
Business Professionals Network

Монголын үйлдвэрлэлийн хөгжлийн төлөө



BPN Монгол

Хэзээ ч бүү бууж өг!



BPN Монгол
салбарын захирал:
Маркус Эппэр

Би та бүхэнд нэг үлгэр ярьж өгье:

Нэгэн өдөр тариачны илжиг худагт ойчжээ. Илжиг гаслантайгаар олон цаг аврал эрэн хашхирав. Тариачин илжгээ хэрхэн аврах билээ хэмээн удтал эргэцүүлэн бодсоны эцэст илжиг хэтэрхий хөгшин, мөн худгийг тэртээ тэргүй булах шаардлагатай болсныг санан илжгээ аврахгүй байхаар шийдэв.


Тариачин тосгоны хөршүүдээсээ тусламж хүссэнээр, хүн бүр хүрз барин шороо хутгаж худаг уруу хийж эхэллээ. Юу тохиолдсоныг ухамсарласан илжиг дуу алдан уйлж эхэллээ. Гэсэн ч удалгүй илжиг тайвшран чимээгүй болов.

Хэд хэдэн хүрз шороо хийсний дараагаар тариачин худаг руу өнгийгөөд нүдэндээ ч итгэмгүй үйл явдал олж харах нь тэр. Нуруун дээрээс нь шороо асгах бүрд илжиг түүнийг сэгсрэн, асгарсан шороон дээр гишгэн нэг алхам дээшилж байлаа.

Тариачны хөршүүд илжигний дээрээс шороо асгасаар, харин илжиг шороог сэгсэрч алхам алхмаар дээшилсээр байв. Тун удалгүй илжиг худгийн ирмэгийг даван гарч ирж, баяр хөөртэйгөөр давхихад бүгд гайхширан хоцров.

Энэ үлгэрээс бид юу сурах вэ? Амьдралд бид өчнөөн олон янзын саад бэршээлтэй тулгарна. Энэ бүхнийг даван туулах арга нь энэ үлгэрт илжиг өөр дээрээ асгарсан шороог тухай бүрд нь сэгсрэн хаяж байсантай адил өөрт тулгарсан саад бэрхшээл бүрийг цаг тухайд нь шийдэж нэг алхам урагшлах юм. Та бууж өгөөгүй цагт хувийн амьдралд ч, бизнесийн хувьд ч ямар ч гүн ангал, нүхнээс дээш гарч ирж чадна.

BPN-ийн зорилго бол бизнес эрхлэгчдэд урам зориг өгч, компанийнх нь өсөлтөд дэмжлэг үзүүлэх явдал юм. Өсөхгүй байгаа компани дампуурна гэдэгт бид итгэдэг.



Чанарын болон тоон өсөлт нь анхнаасаа л BPN-ийн хамгийн чухал гүйцэтгэлийн шалгуур үзүүлэлтүүдийн нэг байсаар ирсэн. Үүнийг хөтөлбөрийн оролцогч бизнес эрхлэгчдэдээ үлгэр дуурайлал болгох нь бидний үүрэг юм

Хамгийн хэцүү цаг мөчүүдэд бидний амьдралын хамгийн үнэ цэнтэй, сайхан дурсамжууд бүтээгддэг. Та бүхэн хийж буй зүйлээ зогсолтгүй цааш үргэлжлүүлээрэй. Хүнд хэцүү бүхний эцэст хүчирхэг хүмүүс бий болдог. 2023 онд та бүхэнд хамгийн сайн сайхан бүхнийг хүсэн ерөөе!

Маркус Эппэр

BPN Монгол салбарын захирал



Нэгэн он улиран одож хуанлийн шинэ хуудас нээгдэж байна.



**ВРН-ийн хөтөлбөрийн
удирдагч, бизнес көүч:
О.Эрдэнэсүрэн**

Хэн нэг нь өдөр, сар хоног, цаг хугацааг хурдасгах товчлуур дарсан гэлтэй 2022 он ВРН-чүүд бидний хувьд эрч хүчтэй, олз омог, үйл явдлаар дүүрэн хийж бүтээсэн жил болж нэг мэдэхэд шинэ онтой золгох мөч иржээ.

Дэлхий нийтээр нүүрлэж буй эдийн засгийн хямрал манай хөтөлбөрийн оролцогчид төдийгүй бүх бизнес эрхлэгчдийн хувьд хүндхэн сорилт болж байгаа билээ. Бид та бүхэнд тулгарч буй олон саад бэрхшээл, асуудлуудаас яг аль нь зорилго, алсын хараа, амжилтад хүрэхэд хамгийн их саад тотгор болж байна вэ гэдгийг хамтдаа олж харан бизнес эрхлэгчийн хувьд гаргаж буй шийдвэрүүдийг тань чиглүүлэх буюу удирдлагын көүчинг, зөвлөгөөнд илүү төвлөрч бизнесийн удирдлагын зүгээс дэмжин ажилласан.

Энэ онд бид давхардсан тоогоор 135 бизнес көүчинг, зөвлөгөөг хөтөлбөрийн оролцогчдодоо үзүүлсэн байна. Бидний зүгээс бизнес көүчинг, зөвлөх үйлчилгээний багаа өргөжүүлэх, экспертүүд болон көүчүүдээ тасралтгүй шинэ мэдээллээр хангаж дэлхийн чиг хандлагыг дагаж мэдрэх, чадавхжуулах тал дээр түлхүү анхаарлаа хандуулан ажиллажээ.

ВРН-ийн Монгол болон Швейцар көүчүүд Швейцар экспертийн ахисан түвшний 3 шатлалт сургалтад хамрагдаж, баг дотроо сурснаа практикт хэрэгжүүлэх хөтөлбөр хэрэгжүүлэн ажиллаж байна.

2022 онд нийт 18 салбарын 23 орчим бизнес эрхлэгчид ВРН-ийн хөтөлбөрт хамрагдан бизнес көүчинг, зөвлөгөө, сургалтууддаа оролцсон байна.

ВРН-чүүд бид 2022 ондоо 170 орчим ажлын байр нэмэгдүүлэхэд өөрсдийн хувь нэмрийг оруулж, МУ-ын эдийн засагт хамгийн их нөлөө үзүүлж буй нэмүү өртөг шингээн үйлдвэрлэл эрхлэгчдийг дэмжин ажиллан амжилттайгаар шинэ оноо угтаж байна.

Бидэнд итгэл найдвар үзүүлж, хүнд хэцүү он жилүүдийг эрч хүчтэй даван туулж, өөрсдийн зорилгын төлөө урам зоригтойгоор бидэнтэй хамт байгаа эрхэм бизнес эрхлэгчдэдээ талархсанаа илэрхийлье!

Хамтын ажиллагаа-хамтын хөгжил



ВРН-ийн
Сонгон
шалгаруулалт
хариуцсан ажилтан:
Ц.Дуламрагчаа

Аливаа зүйлийг бусдаасаа суралцах, туршлага солилцох, байнга хөгжих нь ВРН-ийн хамгийн чухал зарчим. Энэ ч утгаараа бид ХААН БАНКНЫ ЖДБДТөвтэй хамтран „Хөгжлийн хөтөлбөр-2022“ хамтын хөтөлбөрийг 2 дахь удаагаа хэрэгжүүллээ. Жижиг дунд үйлдвэрлэл, үйлчилгээ эрхлэгчдэд дутагдаж буй бизнесийн ур чадварыг сайжруулах, бизнес эрхлэгчдийг удирдлагын төвшинд чадавхжуулах хамтарсан сургалтыг зохион байгуулж, зөвлөх үйлчилгээг хүргэх, шаардлагатай тоног төхөөрөмжийн санхүүжилтээр ханган тэдний бизнесийг цогцоор нь дэмжиж байгаагаараа энэ хөтөлбөр онцлогтой юм.

Хамтын хөтөлбөрт салбар салбараас бүрдсэн нийт 17 бизнес эрхлэгч хамрагдсан. Үүнд: Гоёл Кашмер ХХК, Бест Мадер ХХК, Таримал Ургамал ХХК, Номт хувцас загвар ХХК, Царамтайн Арвай ХХК, Вүүл Крафт ХХК, Гурванхайрхан Уул ХХК, Скай Тунел ХХК, Өлзийт Бэл ХХК, Баялаг Шим ХХК, Эвт Чулуу ХХК, Жавхлант Говь Инвестмент ХХК-ийн удирдлагууд амжилттай оролцлоо.

Хөтөлбөрөөр Монгол болон Швейцар экспертүүд Швейцарын амжилттай яваа компаниудын бодит жишээг авч ярилцан, багийн ажлыг идэвхтэй явуулж байсан нь сургалтыг илүү үр дүнтэй, сонирхолтой болгосон юм. Мөн бид хамрагдаж буй бизнес эрхлэгчдийн тоонд бус хамтын хөтөлбөрийн чанарт анхааран ажиллаж, Швейцар, Монгол экспертүүдийн зөвлөх үйлчилгээгээр сургалтаар сурсан зүйлсээ практикт хэрэгжүүлэхэд нь дэмжлэг үзүүлэн ажиллаж байна.



Түүнчлэн тухайн бизнес эрхлэгчийн зээлийн хэрэгцээ шаардлага нь ямар байна вэ? зээл авахгүйгээр өөрт байгаа нөөц бололцоогоо хэрхэн ашиглах вэ?, зээл авсны дараагаар түүнийгээ хэрхэн үр дүнтэй ашиглах вэ? гэх мэт зээлийн үр өгөөжтэй байдал дээр илүү их анхааран ажиллаж байна. Хамтын хөтөлбөрт хамрагдсан, зээлийн хэрэгцээ шаардлагатай бизнес эрхлэгчид тоног төхөөрөмжийн зээл авах хүсэлтээ гаргаад байна. Мөн „Хөгжлийн хөтөлбөр-2022“-т оролцсон бизнес эрхлэгчид цаашид зөвхөн энэ хөтөлбөрт хамрагдаад зогсохгүй BPN-н бусад үйл ажиллагаанд хамрагдан, бизнесээ илүү их амжилтад хүргэх нууцаас суралцахаас гадна бусад байгууллагын удирдлагуудтай танилцах, туршлага солилцох цаашлаад бизнесийн түншүүд болох боломжтойгоороо давуу талтай.

Ирэх 2023 онд ХААН БАНКНЫ ЖДБДТөвтэй хамтран хөгжлийн хөтөлбөрийг дахин хэрэгжүүлэхээр төлөвлөж буйгаас гадна илүү олон бизнес эрхлэгчдийг хамруулан, тэдэнд бизнесээ хэрхэн мэргэжлийн төвшинд удирдах арга барил, мэдлэгээсээ хуваалцах болно.

Бидний цаашдын хамтын ажиллагаа улам өргөжин тэлж, бизнес эрхлэгчдийг амжилт уруу хөтлөх луужин нь болно гэдэгт итгэлтэй байна.



Бизнес академи




БPN-ийн
сургалт хариуцсан
ажилтан:
Д.Хүслэн

БPN-ийн “Бизнес Академи” нь бизнес эрхлэгчдэд Швейцарын системчилсэн арга зүйгээр бизнесийн удирдлагын мэдлэг олгох сургалтуудыг санал болгодог билээ. Удаан үргэлжилсэн Ковид-19 цар тахлын нөхцөл байдал эргээд хэвийн байдалдаа орсонтой холбогдуулан бид Бизнес Академийнхаа хүрээнд бүх сургалтуудаа эргээд танхимаар зохион байгуулж эхэлсэн. Энэ жил бизнес эрхлэгчдэд зориулан 11, байгууллага, хамт олонд зориулан 4, Хаан Банктай хамтарсан “Хөгжлийн Хөтөлбөр-2”-ийн хүрээнд 6, нийт 21 сургалтыг тус тус амжилттай зохион байгуулж дууслаа.

Тодруулбал захирлуудад чиглэсэн БPN-ийн үндсэн 4 сургалтууд болох “Бизнесийн удирдлага” сургалтыг 2 удаа, “Санхүүгийн менежмент”, “Маркетинг” болон “Хамт олноо удирдах” гэсэн сургалтуудыг тус тус 1 удаа амжилттай зохион байгууллаа. Бид үндсэн сургалтуудаас гадна хөтөлбөрийн оролцогчид, бизнес эрхлэгчдэдээ зориулан нэмэлт сургалтуудыг санал болгодог. Хамгийн их эрэлт хэрэгцээ бүхий “Цагийн Менежмент”, мөн шинээр санал болгож буй “Борлуулалтын өвөрмөц саналыг тодорхойлох нь” зэрэг сургалтуудыг тав тухтай орчин, гадаад мэргэжилтнүүдийн мэдлэг, ур чадвар болон найрсаг хамт олны чадварлаг зохион байгуулалт дор 200 гаруй оролцогчидтойгоор зохион байгууллаа.

Манай нийгмийн тулгамдсан асуудлуудын нэг болох “ЗӨВ ХАНДЛАГА”-тай байх талаар хөтөлбөрийн оролцогчдынхоо ажилтнуудад тусгайлан “Хандлагын менежмент”, “Байгууллагын ёс зүй” сургалтуудыг ажилтнуудаа сэдэлжүүлэх, урам зоригжуулах зорилго дор мөн байгууллагынхаа алсын харааг хамтдаа тодорхойлж компанийнхаа хөгжлийн түүчээ болох боломжийг олгох “Байгууллагын алсын хараа” гэсэн сургалтыг амжилттай зохион байгуулсан.



Хаан Банктай хамтарсан “Хөгжлийн Хөтөлбөр-2”-ийн тухайд 1 сарын хугацаатай үргэлжилсэн бөгөөд энэ хугацаандаа 6 шинэ сэдэвт сургалтуудыг санал болгосон. Дурдвал, БРН-ийн Эксперт пүүлийн зөвлөх Маркус Крамерийн “Брендинг” болон “Илүү их хэрэглэгч олох нь” мастерклассууд уг төслийн хүрээн дэх шинэ сургалтууд байлаа. Энэхүү хөтөлбөрт хамрагдсан оролцогчид үнэхээр сэтгэл хангалуун байсан ба агуулга баялагтай, зохион байгуулалт сайтайгаас гадна сурсан зүйлсээ шууд амьдрал дээр хэрэгжүүлэх боломжтойг онцолж байсан юм.

“Боловсрол эзэмшихийн зорилго нь мэдэхэд бус хэрэгжүүлэхэд оршино” гэдэг.

Энэ дашрамд БРН-ий сургалтуудад хамрагдсан бүх оролцогчдооо сурсан, мэдсэн зүйлсээ өөрсдийн бизнестээ хэрэгжүүлэхэд нь амжилт хүсье!

Ирэх 2023 онд бид Швейцар экспертүүдээс гадна дотоодын чадварлаг сургагч багш нартай хамтран бизнес эрхлэгчдийнхээ хэрэгцээ шаардлагад нийцэхүйц, цаг үеэ мэдэрсэн сургалтуудыг санал болгон ажиллах болно.

Эх орныхоо хөгжилд үнэтэй хувь нэмэр оруулж буй эрхэм баялаг бүтээгч та бүхэнтэй хамтран ажиллахдаа БРН-ийн зүгээс үргэлж таатай байх болно.



Бизнес көучинг




БPN-ийн
Бизнес көуч:
С.Цэндсүрэн

Бизнес көучинг үйлчилгээ харьцангуй шинэ ойлголт хэдий ч сүүлийн жилүүдэд хурдацтай өргөжиж байна. Компани бүрийн нөхцөл байдал бусдаас онцгой, үүнтэй адил удирдагч бүрийн чадвар, арга барил харилцан адилгүй. Тиймээс бүх компанид тохирох нийтлэг нэг амжилтад хүргэх нууц жор гэж байхгүй. Харин компаниа амжилтад хүргэх тусгай жорыг зөвхөн бизнес эрхлэгчид өөрсдөө бүтээж чадна. Харин бизнес көучүүд л тэднийг амжилтад чиглүүлж залах болно.

Зөвхөн гарааны бизнес эрхлэгчид болон жижиг дунд бизнес эрхлэгчдэд зөвлөгөө, көучинг хэрэгтэй байдаггүйг өнөөдрийн бодит жишээнүүд баталсаар байна. Дэлхийн тэргүүлэгч том компаниудын удирдлагууд, удирдах түвшний ажилтнууд хэд хэдэн көучтэй байх нь түгээмэл болсон.

Харин ковид-19 вирусээс үүдэлтэй цар тахал, эдийн засгийн хямрал, түүнээс үүдэлтэй бизнесийн орчны өөрчлөлтүүд, мөн хэрэглэгчдийн зан төлөвт гарсан өөрчлөлтүүд зэрэг нь компаниудын хувьд үргэлжилсэн олон сорилтуудыг үүсгэсээр байна. Ийм хүнд нөхцөлд компанийн удирдлагууд буюу бизнес эрхлэгчид ажлын байраа хадгалах, улмаар бизнесээ авч үлдэхийн тулд бүтээгдэхүүн үйлчилгээгээ сайжруулах, цаашлаад бизнес загвараа шинэчлэх шаардлагатай тулгарч байгаа.

Олон талын сорилт, шахалтууд дунд бизнес эрхлэгчид өдөр тутмын гал унтраах даалгавруудад анхаарал хандуулснаар бизнесийнхээ алсын хараа, зорилго зорилтууд болон бодлого стратегиа эргэцүүлэн шинэчлэх, улмаар түүндээ чиглэж ажиллахдаа хангалттай төвлөрч чаддаггүй. Тийм болохоор компанийн удирдлагуудад бизнес көучинг үйлчилгээ улам их хэрэгтэй болж байна.





BPN сүүлийн жилүүдэд бизнес зөвлөгөө өгөх үйлчилгээнийхээ хажуугаар бизнес көучингийн үйлчилгээг нэвтрүүлж, Швейцар болон Монгол көучүүдээ ОУ-ийн көучүүдийн сургалтад хамруулж, тэднийхээ ур чадварыг жил бүр нэмэгдүүлж, көучингийн багаа тогтмол чадавхжуулж, томруулсаар байна.

Бид бизнес көучинг үйлчилгээгээрээ дамжуулан бизнес эрхлэгчдэдээ өдөр тутмын үйл ажиллагаанаас түр хөндийрч компаниа том зургаар харах, бодлоо цэгцлэх, харах өнцгөө өөрчлөх боломжийг бүрдүүлж өгдөг. Ингэснээр тэд тулгамдаж буй асуудлаа зөв тодорхойлж, асуудалдаа гацах бус ирээдүйдээ төвлөрснөөр гарц шийдлээ олох, хайрцгаас гадуур сэтгэх, зорилгодоо чиглэх, нөөц боломжуудаа бүрэн дүүрэн ашиглан бизнесээ дараагийн түвшинд гаргахад чиглүүлдэг.

BPN Монгол салбар маань энэ жил көучингийн багтаа 3 шинэ ажилтан авснаар өнөөдөр манай көучинг баг 7 хүнтэй ажиллаж байна. Ингэснээр бид ирж буй 2023 ондоо илүү олон бизнес эрхлэгчдэд хүрч ажиллах таатай боломж бүрдэж байна.

Эрхэм хүндэт хөтөлбөрийн оролцогчид, бизнес эрхлэгчид та бүхэн бидэнтэй хамт бизнесээ дараагийн түвшинд гаргаарай. Амжилт руу хамтдаа тэмүүлье!



Би анх 2018 онд “Хамт олноо удирдахуй” сургалтын талаарх мэдээллийг Фейсбүүк-ээс олж хараад сонирхон сууж байлаа. Миний хувьд өөрийгөө бизнесээ гайгүй авч явдаг гэж боддог байсан боловч энэ сургалтаас хойш надад бизнесээ олон талаар сайжруулж, зөв голдиролд оруулах хэрэгтэй юм байна гэдгийг ойлгосон. Өөрөөр хэлбэл өөрийн бизнес төлөвлөгөөгөө боловсруулж, араас нь эхэлсэн номоо урд талаас нь уншиж эхэлсэн.

Үүнээс хойш BPN-ээс зохион байгуулдаг бүх сургалтад өөрөө болон менежерүүдээ хамруулан Монгол орныхоо хөгжилд компанийнхаа зүгээс өөрсдийн гэсэн хувь нэмрээ оруулахаар зорин ажиллаж байна.

Энэ жил 2022 оны Бизнес Эрхлэгчдийн “Оргил Луу” Нийгэмлэгээс зохион байгуулдаг Швейцарын бизнес аялалд хамрагдах боломж олдсонд маш их баярлаж байгаа. Энэ аялал мянга сонсохоор нэг үз гэдэг үгийг аргагүй санагдуулсан сайхан туршлага байлаа. Аяллаар Швейцар улсын бизнес эрхлэгчдийн туршлагаас гадна, Оргил Луу Нийгэмлэгийн гишүүдтэйгээ ойр дотно танилцаж, бизнес бие биеэсээ туршлага судалж, санал бодлоо солилцсон, эрч хүч авсан сайхан аялал болсон.

Мөн энэхүү аяллаар BPN-ийн үүсгэн байгуулагчийн зохион байгуулдаг хөрөнгө оруулагч нарын уулзалтад оролцон Монгол орныхоо бизнес эрхлэгчдийн төлөөлөл болж, хөрөнгө оруулагч нарт санал бодлоо хуваалцсан нь их онцлог байлаа.



Хөтөлбөрийн оролцогч
Номадик Адвенчер ХХК-ийн үүсгэн байгуулагч
Б.Бямбасүрэн



Бизнес эрхлэгчдийн нийгэмлэг

Бизнес эрхлэгчдийн нийгэмлэг BPN-ийн хөтөлбөрийн оролцогчдын санаачилгаар анх 2018 онд үүсгэн байгуулагдсан бөгөөд гишүүдэд үйлчлэх төрийн бус байгууллага статустай үйл ажиллагаагаа явуулж байна. Нийгэмлэгийн гол зорилго нь бизнес эрхлэгчид хоорондоо туршлагаа хуваалцах, биеэ биеэсээ суралцах, “Networking” хийх мөн салбарын үзэсгэлэн худалдаанд нээлттэй оролцохоос гадна Швейцарын бизнес аялалд хамрагдан өөрийн бизнестээ үнэтэй хувь нэмэр оруулахад оршдог.

Бид өнгөрсөн хугацаанд нийт 3 удаа “Бизнес аялал” зохион байгуулаад байна. Швейцарын бизнес эрхлэгчид ямар арга замаар амжилтад хүрч бүтээгдэхүүн, үйлчилгээ нь яагаад дэлхийд чанараараа тэргүүлдэг, бизнесээ хэрхэн амжилттай удирддаг вэ гэдгийг таньж мэдэн, туршлага судлах нь бизнес аяллын гол зорилго байдаг. Жил жилийн бизнес аялалд хамрагдсан манай бизнес эрхлэгчид аяллаас сурсан мэдлэг, туршлагаа өөрийн бизнесийн үйл ажиллагаандаа тусгаж, нутагшуулсаар байна.

Мөн BPN Нийгэмлэгийн зүгээс хөтөлбөрийн оролцогчдодоо “Монголын Ажил Олгогч Эздийн Нэгдсэн Холбоо”, ХБНГУ-ын талаас “GIZ” байгууллагууд хариуцан хэрэгжүүлдэг "Менежер бэлтгэх сургалт-хөтөлбөр"- ийг санал болгодог билээ. Энэхүү хөтөлбөрийн гол зорилго нь Монгол улс дахь аж ахуй нэгж, хувийн хэвшил, жижиг дунд үйлдвэрийн хөгжлийг хурдасгах, Герман улсын шилдэг менежментийн тогтолцооноос суралцах, орчин үеийн шинэ техник технологи болон арга барилыг өөрийн бизнест нэвтрүүлэхэд туслах



бөгөөд энэхүү хөтөлбөрт BPN нийгэмлэгээс энэ удаад хүнсний үйлдвэрлэлийн чиглэлээр хамрагдаж, хамтын ажиллагааг судалж байна.

2022 оны 10 сарын 20-24-ний өдрүүдэд ХХААХҮЯ, Монголын ноос ноолуурын холбоо болон Монголын арьс ширний үйлдвэрлэлийн холбоо хамтран зохион байгуулсан “Ноос Ноолуур арьс ширэн бүтээгдэхүүн-2022” үзэсгэлэнд нийгэмлэгийн гишүүдийн бүтээгдэхүүн, борлуулалтыг нэмэгдүүлэх, сурталчлах зорилгын хүрээнд “Цайдам Трейд”, “Хүүгийн Гутал” компаниуд тус тусын бүтээгдэхүүнээрээ амжилттай оролцсон.

Энэ жилийн нийгэмлэгийн үйл ажиллагааны төлөвлөгөөний дагуу “Networking” арга хэмжээг зохион байгуулсан. Энэхүү үйл ажиллагаанд BPN-ийн хөтөлбөрийн бизнес эрхлэгчид болон нийгэмлэгийн талаарх мэдээлэл авах сонирхолтой салбар бүрийн бизнес эрхлэгчдийн төлөөлөл оролцож өөр хоорондоо танилцахаас гадна, бараа бүтээгдэхүүнээ дэлгэн танилцуулсан юм. Мөн тус арга хэмжээний үеэр Чиглэл ХХК-ийн захирал хөтөлбөрийн оролцогч Ц.Бумцэнд “BPN-тэй анх танилцсан түүх, амжилтын нууц” сэдвээр богино хэмжээний илтгэл тавьж өөрийн мэдлэг туршлагаа хуваалцсан.

BPN Нийгэмлэг 2023 онд урьд өмнө хэрэгжүүлж байсан үйл ажиллагаагаа илүү өргөн хүрээнд зохион байгуулах ба шинээр олон ажлууд эхлүүлэхээр төлөвлөж байгаа тул бизнес эрхлэгчид та бүхнийг нийгэмлэгийнхээ үйл ажиллагаанд өргөнөөр хамрагдахыг урьж байна.





Хөтөлбөрийн оролцогч
"Хүүгийн Гутал" ХХК-ийн
захирал
Г.Алтанхуяг

Энэ удаагийн бизнес аялалд сэтгэгдэл дүүрэн байгаа бөгөөд маш их зүйлийг сурч мэдлээ.

Швейцарын бизнес эрхлэгчид бид нартай л адил хүнд бэрхшээлтэй тулгардаг юм байна гэдгийг мэдэж авлаа.

Бизнес аялалд явах болсон шалтгаан маань:

- Швейцар улс хэрхэн яаж өндөр хөгжиж байна гэдгийг мэдэх,
- Мөн сургалтуудаар жишээ болгон үзүүлдэг, үйлдвэрүүдтэй танилцах,
- Өөрийн бизнестээ хэрэг болох санаа олж авах зорилготой явсан.

Аливаа зүйл, бизнесийг маш эмх цэгцтэй авч явах ёстой юм байна гэдгийг сайн ойлгож авсан. Швейцар компаниудтай танилцаж явахад ажилчид нь маш их зүтгэлтэй, өөрийн байгууллагынхаа төлөө зүтгэдэг, захирлууд нь олон цагаар ажилладаг болох нь анзаарагдсан. Мөн бидэнтэй л адил бэрхшээл тулгардаг, бэрхшээлийг давж туулах бодлого нь өөр байдаг юм байна гэдгийг ойлголоо. Бизнесийг урт хугацаанд тогтвортой явуулах нь чухал бөгөөд бэрхшээл гарвал түүнийг урт хугацаанд даван туулдаг юм байна гэдгийг сайн ойлголоо.

Швейцар орон яаж хөгжөөд байна гэвэл энэ орон хүмүүс нь нийтээрээ маш сайн боловсролтой байдаг юм байна. Манай орон ч гэсэн нийтээрээ боловсорч чадвал Швейцар орноос дутахааргүй хөгжих боломж байна.

Энэхүү аяллыг амжилттай зохион байгуулсан BPN-ийн хамт олондоо баярлалаа.

ХӨТӨЛБӨРИЙН ОРОЛЦОГЧДЫН СЭТГЭГДЭЛ



SOS мал эмнэлэг
Э.Эгнэгшгүй

БPN-ийн сургалтаар дамжуулан удирдлагын арга барилд суралцаж, эмнэлэгийнхээ үйл ажиллагаанд оюунлаг хөрөнгө оруулалт хийж байгаадаа баяртай байна.



"ЖАРГАЛ" ЧХХ
эмнэлэг
Э.Оюунчимэг

Баяр баясгалан итгэл найдвар, мэдлэг бэлэглэдэг BPN-ийн хамт олондоо болон Маркус Эппэр багшдаа их баярлалаа

Хөтөлбөрийн оролцогчдын сэтгэгдэл видео хэлбэрээр

Г.Алтанхуяг



Г.Мандахгэрэл



Л.Зул



БАЯРЛАЛАА

